

**EM10 pitinnagu sioqqutsillutik Naalakkersuisut kalaallit ilinniartut inuuniarnermikkut atugaat pillugit misissuisitsinissaat pillugu Inatsisartunut aalajangiiffigisassatut siunnersuut. Misissuinerup periarfississavaa Kalaallit Nunaanni danmarkimi, nunanilu allani ilinniartut atugaasa assersuusinnaalernissaat siunertaralugu ilinniartut atugaasa allanngartissinnaalernissaat**

**pillugu**

**Kultureqarnermut, Ilinniartitaanermut, Ilisimatusarnermut Ilageeqarnermullu ataatsimiititaliap**

**ISUMALIUTISSIISSUTAA**

**Siunnerssutip aappassaaneerreqarnissaanut tunniunneqartoq**

Kultureqarnermut, Ilinniartitaanermut, Ilisimatusarnermut Ilageeqarnermullu ataatsimiititaliaq kingullermik siunnersuummik suliarinninnermini ukuninnga inuttaqarpoq:

Harald Bianco, Inuit Ataqtigiit

Debora Kleist, Inuit Ataqtigiit

Andreas Uldum, Demokraatit

Malik Berthelsen, Siumut

Knud Kristiansen, Atassut

Kultureqarnermut, Ilinniartitaanermut, Ilisimatusarnermut Ilageeqarnermullu ataatsimiititaliaq UPA10-mi ulloq 4. maj siunnersuut misissuartaarpaa.

**Siunnersuutip imarisai**

Kalaallit ilinniagaqartut inuuniarnermikkut atugaasa misissorneqarnissaat siunnersuuteqartunit kissaatigineqarpoq, makku qulakkeerumallugit:

1. Kalaallit ilinniagaqartut atugaasa assigiilernissaat imaluunniit pitsaanerulernissaat Kalaallit Nunaanni, Danmarkimi imaluunniit nunani allani atuaraluarunik.
2. Ilinniagaqarnerisutit pissusissamisoornerpaamik atorneqartarnissaat.

**Ataatsimiititaliap siunnersuummik suliarinninera**

Siunnersuut Naalakkersuisut akuersissutigineqartussanngorlugu inassutigisimagaat misissuinissallu aallartinneqarnissaanut paasiniaallutik aallartereersimammata ilinniagaqartullu peqatigiiffiunik nunatsinnilu ilinniartinnik kiisalu Danmarkimi kalaallit illuinik aammattaaq Naalakkersuisut attaveqareersimammata Ataatsimiititaliap maluginiarpaa. Partiit tamarmik siunnersuummut tapersiimmata aammattaaq Ataatsimiititaliap maluginiarpaa.

Kalaallit ilinniagaqartut misilittagaat Danmarkimeersuinnaanngitsunik kisiannili aamma Islandimeersunik Norgemeersunillu aammali pissusissamisuussappat nunanit allaneersunik Naalakkersuisut ilannguteqqullugit Ataatsimiititaliamiit kaammattorneqarput. Ilanngulluguttaaq Danmarkimi kalaallit ilinniagaqartut danskit tapiissutaannik SU-mik pisartagaqalernissaat kalaallit ilinniagaqarnersiutaannik annaasaqaatiginngikkaluarlugu immikkut aaqqissuussiffigineqarnissaat Naalakkersuisunut immikkut kaammattuutigineqassaq. Uani Ataatsimiititaliamit immikkut eqqarsaatigineqarpoq ukiumoortumik sulinnigiffeqarluni angalasarnerit.

Nunani allani ilinniagaqartut assigiilluinnarmik atugassaqtinnissaat pillugu neqeroortigineqarsinnaanera ajornakusoorsinnaammat Ataatsimiititaliap akueraa. Assersuutigalugu illoqarfiit ilinniartoqarfiusut ilaat najugaqarfigissallugit akisoorujussuusinnaapput. Assersuutigalugu Københavnimi imaluunniit Los Angelesimi ilinniartuugaanni angallannermut aningaasartuutit assigiinngitsorujussuusinnaapput. Ilinniagaq sunaanersoq apeqqutaalluni ilinniartut ineqarnermut akiliutaat assigiinngissuteqarsinnaapput assersuutigalugu suliffimmut sungiusarnermut assigisaannilluunniit atatillugu ilinniartut ilaat saniatigut isertitaqartarput. Assigiinngissutsit tamakkua misissuineri sillimaffigineqartariaqarput.

Tamatuma saniatigut misissuineq takussutissiinikkut paasissutissanik periutsinillu aallaaveqarluni suliarineqartariaqartoq taamaalilluni misissuineri inernerusut misissuinerit allanut sanilliunneqarsinnaasunngorlugit Ataatsimiititaliamit siunnersuutigineqarpoq.

Naalakkersuisut akissuteqaataanni ilisimatitsissutigineqarpoq ilinniagaqartut atugarisaasa assigiissarneqarnissaat aningaasaliissutaareersut iluini ingerlanneqarsinnasoq. Tamaana Ataatsimiititaliamit isumaqatigineqarpoq. Taamaattorli ilinniartitaanerup iluani allanik sipaarniuteqarneq aqqutigalugu ilinniagaqarnersiutinik qaffaanissamut aningaasartuuteqarnerunissaq Naalakkersuisunit aningaasalersorneqassappat pissusissamisuunngimmat Ataatsimiititaliap tikkuarusuppaa. Akerlianik ilinniagaqartut tamarmik sapinngisaq tamaat malittarisassatigut aalajangersarneqartunik

atugassaqartinniarlugit neqeroortoqarsinnaanera taamaalilluni eqqoriaanerit tulleriingitsullu sapinngisamik killilersimaarniarlugit tamanna Ataatsimiititaliamit pitsaasutut isigineqarpoq.

Naggataatigut ilinniagaqarnersiutit pillugit nalunaarusiap kukkunersiorneqarnissaata kinguartinneqarnissaanik Naalakkersuisut aalajangernerat Ataatsimiititaliamit taperserneqarpoq ilinniagaqartut atugarisaanik misissuinerup tamanna pisariaqartinneqartoq paasinarsitippassuk.

### **Inassuteqaatit**

Qulaani allassimasut siunnersuummillu siullermeerinninnermi oqaaseqaatigineqartut tunuliaqutaralugit **Ataatsimiititaliap isumaqatigiittup** siunnersuut **akuersissutigineqassasoq** inassutigaa.

Ataatsimiititaliap taama oqaaseqaateqarluni siunnersuut aappasaaniigassanngortipaa.

Harald Bianco

Debora Kleist

Andreas Uldum

Malik Berthelsen

Knud Kristiansen